



Број/Број: 03-/4-50-1-10-19-12/9
Сарајево/Сарајево: 13. 1. 2009. године

ZAPISNIK

19. sjednice Zajedničke komisije za evropske integracije Parlamentarne skupštine BiH, održane 13. 1. 2009.

Sjednica je počela u 12 sati.

Predsjedavajući Halid Genjac sazvaо je 19. sjednicu Zajedničke komisije za evropske integracije Parlamentarne skupštine BiH.

Sjednici su prisustvovali članovi Zajedničke komisije: Halid Genjac, Drago Ljubičić, Ivo Miro Jović, Šemsudin Mehmedović, Rudo Vidović, Zoran Koprivica, Alma Čolo, Azra Hadžiahmetović, Milica Marković, te Vlatka Dangubić, sekretar Komisije, i Vladana Lučić, stručni saradnik u Zajedničkoj komisiji. Sjednici su prisustvovali i predstavnici Misije OSCE-a u BiH, Program parlamentarne podrške. Branko Dokić i Selim Bešliagić opravdali su odsustvo.

Predstavnici Misije OSCE-a u BiH kao i predstavnici OHR-a također su prisustvovali sjednici.

Sjednici su prisustvovali i članovi Asocijacije mladih SDA – Tešanj, u okviru posjete državnom parlamentu, koju je organizirao poslanik Šemsudin Mehmedović.

Sjednicom je predsjedavaо predsjedavajući Zajedničke komisije Halid Genjac.

DNEVNI RED

1. Usvajanje Zapisnika 18. sjednice Komisije;
2. Priprema delegacije za 11. međuparlamentarni sastanak Komisije s Delegacijom Evropskog parlamenta za Jugoistočnu Evropu, Brisel, 21. i 22. januar 2009.;
3. Usvajanje Izvještaja o radu Komisije za 2008. godinu;
4. Tekuća pitanja.

Ad. 1. Usvajanje Zapisnika 18. sjednice Komisije

Prilikom usvajanja Zapisnika 18. sjednice Komisije, Šemsudin Mehmedović uputio je primjedbu da u Zapisniku nije navedeno njegovo pitanje upućeno predstavnicima Direkcije za evropske integracije BiH u vezi s IPA fondovima. Obrazlažući primjedbu, on je podsjetio da je na prethodnoj sjednici zatražio pismeni odgovor DEI-a, na pitanje zašto je općinama Tešanj, Doboj Jug i Usora uskraćena mogućnost da apliciraju za projekte iz komponente II IPA fondova. Nakon što je predsjedavajući konstatirao da će ova ispravka biti unesena u Zapisnik, prisutni članovi jednoglasno su usvojili Zapisnik 18. sjednice Komisije.

Ad. 2. Priprema delegacije za 11. međuparlamentarni sastanak Komisije s Delegacijom Evropskog parlamenta za Jugoistočnu Evropu, Brisel, 21. i 22. januar 2009. godine

Predsjedavajući je upoznao prisutne članove da je na nivou kolegija Komisije utvrđen sastav delegacije koja će učestvovati na 11. interparlamentarnom sastanku koji se održava u Briselu 21. i 22. januara 2009.

Milica Marković ukazala je na mogućnost da kolegiji oba doma donesu odluku kojom se ne odobrava članovima Komisije da putuju na 11. interparlamentarni sastanak, jer je u isto vrijeme zakazana i sjednica Predstavničkog doma na kojoj će se raspravljati o državnom budžetu za 2009. godinu.

Azra Hadžiahmetović je, komentirajući mogućnost da se nekim članovima ne odobri putovanje na 11. interparlamentarni sastanak, rekla da je najbolje da se sačeka kako će se o tome izjasniti Zajednički kolegij oba doma.

Šemsudin Mehmedović naglasio je da je prilikom bilateralnih susreta s Delegacijom EP naročito važno da naša delegacija ima usaglašene stavove o temama o kojima će se raspravljati na 11. interparlamentarnom sastanku.

Ivo Miro Jović podsjetio je na važnost interparlamentarnih sastanaka s Delegacijom EP za odnose sa zemljama Jugoistočne Evrope i predložio da se sastanak s Delegacijom Evropskog parlamenta ne uslovljava jer je to jedan od prioriteta u aktivnostima Zajedničke komisije.

Drago Ljubičić također je ponovio da je potrebno da naša delegacija ima jedinstven nastup na sastanku s Delegacijom EP, te da bi bilo neozbiljno intervenirati u vezi s eventualnom promjenom termina održavanja sastanka.

Alma Čolo predložila je da naša delegacija usaglasi amandmane koji će biti uloženi na Zajedničku izjavu. Ona je, između ostalog, rekla da je veoma bitno da stavovi delegacije tokom sastanka budu ujednačeni, s obzirom na činjenicu da članovi Komisije imaju različita gledišta o određenim temama o kojim će se raspravljati na 11. interparlamentarnom sastanku.

Nakon iscrpne rasprave, predsjedavajući je još jednom podsjetio prisutne na važnost 11. interparlamentarnog sastanka, kao i na činjenicu da je termin održavanja sastanka utvrđen još u decembru 2008., te da su kolegiji oba doma na vrijeme obaviješteni o datumu i broju učesnika naše delegacije na interparlamentarnom sastanku, kako bi se na vrijeme obavile sve potrebne protokolarne pripreme za održavanje sastanka (koordinacija programa posjete s Evropskim parlamentom, rezervacija avionskih karata i hotelskog smještaja za članove delegacije).

Nakon rasprave, članovi Komisije dogovorili su da su za uvodna izlaganja zaduženi:

1. Milica Marković - Reforma ustava: perspektive za nastavak pregovora;
2. Rudo Vidović - Funkcioniranje pravosuđa i policije i borba protiv korupcije i organiziranog kriminala u BiH;
3. Ivo Miro Jović - Procesuiranje ratnih zločina u domaćem pravosuđu;
4. Halid Genjac - Zdravstvena i socijalna zaštita s posebnim osvrtom na zaštitu žena, djece i starijih lica ;
5. Azra Hadžiahmetović - Ekonomska situacija;
6. Drago Ljubičić - Vizne olakšice, Programi EU i „People to people“(Narod narodu) inicijative: ocjena učešća BiH.

Dogovoreno je da naša delegacija na 11. interparlamentarnom sastanku nastoji objektivno prezentirati stanje u ovim oblastima, naglasiti pozitivne aspekte koje je BiH ostvarila u prethodnom periodu te govoriti u ime Komisije a da u toku rasprave svako ima priliku iznijeti svoje političke stavove.

Ad. 3. Usvajanje Izvještaja o radu Komisije za 2008. godinu

Prisutni članovi Zajedničke komisije jednoglasno su usvojili Izvještaj o radu Komisije za 2008. godinu.

Ad. 4. Tekuća pitanja

Sastanak članova Komisije s ministrom vanjskih poslova Luksemburga Jeanom Asselbornom

U drugom dijelu sjednice članovi Komisije susreli su se s Jeanom Asselbornom, ministrom vanjskih poslova Luksemburga, koji je boravio u zvaničnoj posjeti Bosni i Hercegovini.

Halid Genjac je, u ime Komisije, pozdravio ministra vanjskih poslova Luksemburga i zahvalio na konkretnoj pomoći koju je Luksemburg pružio Bosni i Hercegovini po pitanju euroatlantskih integracija. Predsjedavajući Komisije je, između ostalog, naglasio da Bosna i Hercegovina želi da istraje na putu euroatlantskih integracija ali da joj je na tom putu potrebna pomoć i podrška EU i njenih članica, te u tom kontekstu zatražio pomoć Luksemburga kako bi BiH što prije dobila status zemlje kandidata.

Ministar Asselborn upoznao je članove Komisije o razgovorima koje je imao s visokim bh. zvaničnicima tokom svog boravka u BiH, te naglasio da je njegov utisak da je BiH čvrsto opredijeljena za evropski put. On je rekao da će taj stav prenijeti Briselu i naglasio da će Luksemburg podržati BiH na evropskom putu ali da BiH može postati članica EU samo kao država a ne kao pojedinačni entiteti. On je posebno naglasio potrebu za liberalizacijom viznog režima za bh. građane, kao i iniciranje sporazuma između BiH i Belgijsko-luksemburške unije o recipročnom poticaju i zaštiti investicija, te o izbjegavanju dvostrukog oporezivanja.

Azra Hadžiahmetović ukazala je na potrebu što brže ratifikacije Sporazuma o stabilizaciji i pridruživanju u parlamentima zemalja članica, kao i na potrebu uspostavljanja bilateralnih sporazuma BiH-Luksemburg.

Ivo Miro Jović rekao je da je Luksemburg primjer zemlje visokih demokratskih principa koje bi trebalo da primjenjuje i Bosna i Hercegovina.

Sastanak je završen zajedničkom ocjenom da Luksemburg u potpunosti podržava orijentaciju BiH u pravcu evropskih integracija, a da je BiH spremna da istraje na tom putu, kao i da se nada što skorijem kandidatskom statusu.

Sjednica je završena u 13,30 sati.

Predsjedavajući
Zajedničke komisije
Halid Genjac